



Marc Caprez fa da narr gugent retschertgas. Fin questa stad ha el lavurà tar il Beobachter.

FOTOS C. CADRUVI

In schurnalist cun ina avaina grischuna

DA CLAUDIA CADRUVI / ANR

■ **Marc Caprez ha gia fatg dal tut en sia vita. Dapi l'entschatta avust è el schef da l'emissiun «konsum tv». Ils 4 da settember ves'ins el l'emprima giada live sin SF2.** Sco miradur, sco scolar ed a la bursa a Turitg ha el gia lavurà. El è viaggià bler, cunzunt en l'Africa. Era uschigliò è el savens stà sin il sfratg, sco el di sez. In temp ha el schizunt semià da far carriera cun ina band. Sche Caprez raquinta, pari, sco sch'el avess gia vivì trais vitas. Dasperas ha el «pir» 37 onns ed è dal reminent bab da tschintg uffants.

Creschì si cun blers «fragliuns»

Ils emprims onns è Marc creschì si en il Grischun. Il bab, Hans Caprez, era scolar a Scheid e Tumein. Suentar ha el obtegnì ina piazza tar il «Beobachter» e la famiglia è sa tschentada a Dielsdorf.

«Mes geniturs eran extrem socials», di Caprez. «Quai m'ha influenzà.» La tenuta dals geniturs na sa mussava betg sulet en plets, mabain era en ovras. Cura che Marc e ses frar avevan otg e nov onns han ils geniturs cumenzà a prender si uffants confidads (Pflegekinder). Mintgatant, cura ch'i deva cas urgents che las autoritads na savevan betg nua plazzar, avevan ils Caprezs schizunt tschintg uffants daplì en chasa. Per ordinari eran quai giuvenils tranter 13 e 18 onns.

I marschava adina insatge

Ils giuvenils avevan sa chapescha gia fatg inqual scoperta ed eran magari tips selvadis. «Ils auters uffants na savevan betg che quests giuvens n'eràn betg mes vairs frars», raquinta Caprez. «Perquai na stuevan jau e mes frar mai temair. Tuts avevan respect da noss 'frars gronds'.»

«Nus avain fatg inqual furbaria cun noss frars gronds. Jau sun gia ì cun töff avant ch'jau savev ir sco s'auda cun velo. Nus avevan adina visitas ed ina massa glieud en davos maisa. Tar nus marschavi insatge. Perquai hai jau gia savi da buob ch'jau vi ina giada avair ina gronda famiglia.» «Mia mamma aveva in'immensa curascha civila. Cura ch'insatgi vegniva a reclamar, sa riscudiva ella cun pes e mauns per nus», di Caprez tut losch, ma conceda era: «Suentar ranschav'ella sa chapescha era.»

Cura che Marc è vegnì a la scola chantunala rebellava la giuventetgna da Turitg. «Nossa scola era en embrugls e nus essan sa laschads infectar.» Quai ha gi consequenzas sin las prestaziuns, e Marc è turnà a Dielsdorf en scola secundara.

Pers l'innocenza

Suentar scola ha el cumenzà in emprendissadi da miradur, ma perquai ch'el è creschì memia svelto ha el stuì interromper l'emprendissadi. Suentar intgins jobs ha el anc ina giada empruvà da far gimnasi. Quella giada hai funcziunà: «Igl è stà in bel temp. Jau avev buns scolasts, e nus eran ina buna classa. Il squitsch d'examens na m'ha betg fatg ora bler, damai ch'jau avev sagià la vita sin ils plazzals da bajegiar.»

Suentar la matura n'aveva Caprez betg prescha da studegiar. «Igl è stà in temp sturn cun massa bars illegalas a Turitg che avevan avert fin la damaun. Jau e mes collegas avevan il sentiment d'esser immortals e ch'i na possia capitar nagut a nus.» La finamira era da lavurar in zitg e da viagià per il mund enturn. «Fin che mes meglier ami da la kanti – in fermezza umeneri – è sa disgrazià a Venezuela. Quai è stà la fin da mia 'innocenza'.» Suentar in grond viadi tras l'Africa ha Caprez cumenzà a studegiar da giurisprudenza.

Sper il studi ha Caprez lavurà sco miradur e chantà en ina band. Pli tard ha el chattà in job tar la bursa a Turitg, en il ring.

Caprez junior

Suentar ha Caprez lavurà tar ina dretgira districtuala sco secretari giuridic e tar l'Associaziun d'impressaris da bajegiar. In temp ha el fatg il «um da chasa».

La finala è Caprez sa tschentà tar l'anteriur patrun da ses bab, tar il Beobachter. Là ha el fatg cussegliaziun giuridica ed ha lavurà sco redactor.

El è sa spezialisà sin dumondas d'abitare, da bajegiar e sin il dretg da lavur. Caprez raquinta cun entusiassem da sia lavur tar il Beobachter. «Jau sun adina ì cun plaschair e n'ha jau mai guardà sin l'ura.»

Dis da record fascheva il giurist var 50 cussegliaziuns. «Ma jau sun era stà prompt da tadlar giu glieud che vegniva adina puspè cun il medem. A quella glieud fai magari bain da savair ch'insatgi taidla.» «Sch'ins n'è betg pli prompt da tadlar sin la glieud, na vegn ins betg sisura bunas storys», di Caprez. Quai haja el emprendì dal bab. Lez na saja betg sa nuspi da tadlar sin glieud che nagin pli prendiva serius. Per quest motiv haja ses bab pudì scriver «Die Kinder der Landstrasse» – la megla story da sia vita.

Schurnalist inchnarà

Malgrà che Caprez conceda ch'el na scri-

via betg exnum gugent, è el tuttina schurnalist cun corp ed olma. El ha in bun nas per storys. Il pli gugent fa el retschertgas: studiar actas, sclerir giu la vart giuridica e discurre cun pertutgads. Tar il Beobachter ha el savens fatg questas retschertgas, plitost davos las culissas, e suenter laschà scriver auters collavurators l'istorgia ch'el aveva preparà.

Uss, cun la midada tar «konsum tv», na po el forsa betg pli sa deditgar uschè intensiv a las retschertgas. Sco schef da l'emissiun sto el governar la redacziun e sto star avant la camera durant l'emissiun.

Ils lioms cun Castrisch

E co statti insumma cun las ragischs grischunas e rumantschas? Ils lioms cun il Grischun e cunzunt cun Castrisch resenta el anc ferm, di Caprez. «Schizunt mes uffants che fan per il solit dad ester, sa sentan adina immediat da chasa, sch'els van a Castrisch, era sch'els han pauc contact cun la parentella.»

«Pli baud discurrev'jau adina rumantsch cun mia tatta. Oz vegn jau da far anc in pau small-talk per rumantsch. Sch'i vegn pli cumplitgà, stos jau discurre tudestg.» Insatge saja dentant fitg remartgabel: «Sch'jau sun insanua en ina fulla da glieud ed insatgi discurre sursilvan, lura aud'jau immediat quai, era tras melli vuschs.»

Curt e bun

Num: Marc Andrea Caprez-Gehrig

Datum da naschienscha:

19 d'avust 1967

Lieu da burgais: Trin/Castrisch

Domicil: Turitg / Seefeld

Famiglia: tschintg uffants tranter 4 e 10 onns

Gasetta preferida: Weltwoche

Schurnalist preferi: David Signer

Musica: rock

Hobi: mia famiglia

Viadis preferids: Senegal u l'Africa dal vest

